

Hott un Wischt

Die Küh hebbe Falch, Scheck, Bless odder a Lore ghäße un sie warn fascht all minanner gfleckt. Ich döt emoll sache, daß domols fascht in jedem zwätte Hausch ee odder zwä Küh gschtanne sen. Blous e paar weniche, wie die Houfbauern, de Faschelbröünich odder es Spethe, die hebbe mehr als wie zwä Schtück ghat. Die arme Küh hebbe jedes Johr emoll kalbe gmößt, sie sen gmolke worn un sie sen vor die Wäche, de Pfluch, die Ejche odder die Möhmaschin gschpannt worn.

Im Griech hots blous Küh un Gääs in Schnäbbärch gäbbe. Noch em Griech hebbe es Winklers emoll korzi Zeit, dann es Orts dunne an de Bech un no viel schpäter de Bierbrauers Oskar a Gäül ghat. Äbber ich will no e bisle äbbs über die Küh verzejle. Es ganze Johr über sen die Küh-Fuhrwerke dorch die Schnäbbärcher Gasse graddert. Wenn Kadoffel-Ärn war, odder wenn gezackert worn is do hoscht manchmols 10 odder 12 Gschpanne gleichzeitig dobbem Schtutz, daus de Hammedil odder dhinnem Winterbärch sehe gekönnt.

Weil die mehrschte Menner im Griech warn, do hebbe halt die Weibsläüt mit de Küh rümhandiern gmößt, die alt

Kilchbaasch un es Kilche Fine, es Krichories Hilda odder äbber a die Dote un es Mina. Denne Weibsläüt is gar nix anners überich gebliebe, die hebbe halt es Mischte, es Fudderschneide, es Eigäbbe, es Schtriechele un Börschte, es O- un Ausgscherre, es Zackern un es Ejche lerne gmöbt.

Wenn die Küh eigschpannt warn un wenn mer lousgfahrn is, dann hot mer „Hühr“ gruffe, isses rechtsrüm gange dann hots „Hott“ ghäbe un linksrüm des war „Wischt“. Wenn die Küh schtejbleibe gsollt hebbe, dann hot mer „Oha“, blous „O“ odder a „Brr“ gruffe.

Blous e paar alti Menner, wu nemmi in de Griech gmöbt hebbe, warn no im Dorf. Dodezu hot bei uns im Schwarzvörtel de Borchemeeschters-Vedder ghört un dübbem Seife de alte Spethe-Vedder, des war de Vater vom Spethe Berthold. Ihrn Houf hebbe es Spethe gleich hinnerm Härsch ghat.

Wenn de Spethe-Vedder mit seine Küh naus es Feld gfahrn is, dann hot der dauernd mit seine Küh geblaudert. Do is der uff em Waache gsässe, die Züchel in de eene Henn un die Peitsche in de annere un er hot immerzu vor sich nogsagt, „Wischt-Wischt, oh Hott oh, Wischt-Wischt“ un als widder „Wischt-Wischt“. Selbscht wenn de Spethe-Vedder an emme annern Fuhrwerk vorbeikumme is, also zum Beischpiel am Borchemeeschters-Vedder, dann hot er zum Gruß zu dem nübergegnagt un dodebei weiter „Wischt-Wischt“ gsagt.

Des „Gewischtel“ hebbe die Küh längscht gekennt. Vielleicht hebbe se scho gar nemmi noghört. Denn obwohl de Spethe-Vedder jo immer widder „Wischt-Wischt“ gsagt hot, sen die Küh schöü grad aus glaafe. Wenn de Spethe-

Vedder echt emoll links rüm gwellt hot, dann hot der mit de Peitsche geknallt un a widder „Wischt“ gruffe, blous desmols halt viel lauter.

„Wischt-Wischt, oh Hott oh, Wischt Wischt“ wenn er des beim Fahrn odder Zackern sou vor sich nogebabbelt hot, dann hot des for de Spethe-Vedder blous souviel ghäße wie, „es is alles in Ordnung“, odder „mir sen uff em richtiche Wäch“ un genau so hebbe des dem sei Küh a verschtanne.



Büchlein auf mir singe eens von Josef Knapp